



Nuuk, 20. august 2015

UKA 2015/41

Inatsiartuni suleriaaseq § 33 najoqqutaralugu aalajangiiffigisassatut siunnersuut maanna saqqummiunneqarpoq:

Naalagaaffiit Peqatigiit inuit innarluutillit pillugit Isumaqatigiissutaanni pisinnaatitaaffiit siuarsarneqarnissaannut Naalakkersuisut peqquneqarnissaannik Inatsisartuni aalajangiiffigisassatut siunnersuut, tamatumani inatsimmi pineqartunut atuuttumut atuutsinneqalernissaat aammalu suliat ingerlanneqarnerini Naalagaaffiit Peqatigiit inuiat innarluutillit pillugit Isumaqatigiissutaanni Kalaallit Nunaanni atuuttut suliarineqarnerini iliussissatut pilersaarutinut ilanngullugit suliarineqarnissaat.

(Inatsisartuni eqimattat, Inuit Ataqatigiit)

Tungavilersuut:

Inuit innarluutillit pillugit Naalagaaffiit Peqatigiit Isumaqatigiissutaat danskit naalagaaffiata apeqqusernagu akuersissutigimmagu ilaatigut Kalaallit Nunaanut atuuttussanngortinneqarportaaq, tamatumalu kinguneraa inuit innarluutillit pillugit Naalagaaffiit Peqatigiit Isumaqatigiissutaat Kalaallit Nunaani atuutsinneqassanersoq Inatsisartuni isummorsorfigeqaqaarani atuutsinneqalerluni. Tamatumani aammattaaq kinguneraa inuit innarluutillit pillugit Naalagaaffiit Peqatigiit Isumaqatigiissutaat qanoq iliornikkut atuutsinneqarnissaanik suliniuteqartoqarnissaa atuutsinneqalernissaa sioqqullugu oqaluuserineqarsimanngimmat.

Taamaammat siunnersuutip matuma pineqartup siunertaraa Inatsisartuni isummorsorfigineqassasoq inuit innarluutillit atugarisaasa pitsanngorsarneqarnissaat qanoq qulakkeerneqarlunilu suliarineqassanersoq. Innarluutilinnut tungasunik suliassaqarfik kommuninut ulloq 1. januar 2011-imi tunniunneqarpoq, naliliinissarluni suliarineqaleruttorpoq, innuttaasulli arlariit maannamut assigiinngisitaartorujussuarnik kommuunit aammalu ataatsimut tamaat isigalugu innarluutilinnut sullissinerup pitsaasusaata qaffasisusaa misigisaqarfigivaat.

Inatsisartut qinnuigineqassapput nunatut qanoq iliornikkut pilersaarusiornissanilu inuit innarluutillit pillugit isumaqatigiissut atuutsinniarneqassanersoq, qulakkeerneqarlugu inuit innarluutillit ilaqutaasullu pitsaanagerusunik atugassaqartinnissaat, tamatumani inatsimmi atuutsitinissani inuit innarluutillit pillugit Naalagaaffiit Peqatigiit Isumaqatigiissutaanni pisinnaatitaaffiit allassimasut inatsimmi allassimalernissaasa qulakkeerneqarnissaat.

Pisortanut aningaasaqarnikkut allaffissornikkullu kingunissai:

Ukiup affaa AC-mik suliaqarnissat immikkoortinneqassapput, inuit innarluutillit pillugit Naalagaaffiit Peqatigiit Isumaqatigiissutaata atuutsinneqalernissaanut inatsissatut siunnersuuteqarnissaq suliarineqassammat aammalu Annertuumik innarluutillit ikiorserneqartarnerat pillugu Inatsisartut peqqussutaat nr. 7, 3. november 1994-imeersoq allannguutissallu ataqatigiissarneqarlutik suliarineqassammata.

Taaneqartut Naalakkersuisoqarfiup allaffissornikkut ingerlatsiviani salliunneqarluni suliarineqartariaqarsorinarpoq.

Namminersorlutik ingerlatsisunut aningaasaqarnikkut allaffissornikkullu kingunissai:

Soqanngilaq

Innuttaasunut aningaasaqarnikkut allaffissornikkullu kingunissai:

Siunnersuut toqqaannartumik aningaasaqarnikkut imaluunniit allaffissornikkut innuttaasunut kinguneqassanngilaq, taamaattorli inuiaqatigiinni navialanerpaasut eqimattanut pitsaasumik kinguneqassaaq, siunissarlu sivilunerusoq isigalugu inuiaqatigiinnut pitsaasumik tamanna kinguneqassaaq, qulakkeerneqassammat inuit innarluutillit sullineqarnerisa qaffakkiartortinneqarnissaa.